

PAULO TỸ CARTA HAN: TESSALÔNICA TÁ KE AG MỸ CARTA VE

1 ¹Paulo tỹ rá vĕ. Isỹ cidade tỹ Tessalônica tá ke ag mỹ rán hã vĕ. Tessalônica tá ajag tóg vĕnh măn tĩ, Topĕ vĩ mĕ jé. Topĕ tũ vỹ tỹ ajag nỹtĩ, ěg jóg mág ti. Jesus Cristo tũ vỹ tỹ ajag nỹtĩ gé, ěg Senhor ti. Sỹ ajag mỹ vĕnh rá jĕnĕ vĕ, kỹ Silas vỹ jĕnĕg mũ gé inh mré, Timóteo ke gé. Topĕ mỹ sóg to vĩ tĩ, ti tỹ ajag tar han jé, ti tỹ ajag mỹ vĕnh jykre kusa nĩm jé.

Vĕnh kar tỹ Tessalônica tá ke ag jykre vĕg tí

²Kurã kar ki sóg ajag to Topĕ mré vĩ tĩ. Tĩ mỹ sóg: “há ti nĩ, ã tỹ ag krĩn há han kỹ,” he tĩ, kurã kar ki. ³Sỹ ti mré vĩn kỹ sóg ajag mĩ ěkrég tĩ. Ajag tỹ ti ki ge kỹ nỹtĩn kỹ ajag tóg nén ũ há kar han mũgtĩ. Ajag tỹ ti to há nỹtĩn kỹ ajag tóg rãnrhãj mág han mũgtĩ. Ajag tỹ ěg Senhor tỹ Jesus Cristo ve sór kỹ ajag tóg to krónh ke tũ nĩgtĩ. Tag mĩ sóg ěkrég tĩ, kurã kar ki, sỹ Topĕ mré vĩn kỹ, ěg jóg mág mré.

⁴Inh kanhkã', tỹ ěg tóg Topĕ fe nỹtĩ, ti tỹ ěg kuprĕg ja nĩn kỹ. Tag ki kanhró ěg tóg nỹtĩ. ⁵Sỹ ajag mré nĩn kỹ sóg ajag mỹ Topĕ vĩ sér tó ja nĩgtĩ. Inh pi(jé) inh jykre tỹ vĕmĕn ja nĩgtĩ'. Topĕ jykre hã tỹ sóg vĕmĕn tĩ, Topĕ kuprĩg tỹ inh krĩn kỹ. Tĩ hã vỹ ěg tar han tĩ. Ki hã tó sóg mũ ajag mỹ, tag ki kanhró ajag tóg nỹtĩ. Isỹ ajag mré nĩn kỹ ajag tóg inh ve ja nĩgtĩ, hã kỹ ajag tóg inh jykre ki kanhró nỹtĩ. Sỹ ajag to há nĩn kỹ, hã kỹ sóg ajag mỹ tó ja nĩ. ⁶Inh ri ke han sór ajag tóg mũ, ěg Senhor ri ke ke gé. Sỹ ajag mỹ nén tó ja ěn kri fig ajag tóg tĩ. Kỹ ajag tóg to vĕsyrĕnh jagy han tĩ, ũri, pã'i ag tỹ ajag to kórég nỹtĩn kỹ. Hã ra Topĕ kuprĩg vỹ tỹ ajag jagrĕ nĩ, hã kỹ ajag krĩ tóg kãnhvy' he mũ, ajag vĕsyrĕnh mũ (hã) ra, ěprã. ⁷Hã kỹ vĕnh kar tóg ajag tỹ nén han mũ mĕg mũ sir, ga tỹ Macedônia tá, ga tỹ Grécia tá ke gé, ag tỹ ajag kóm han kãn jé sir, ũ tỹ Jesus ki ge kỹ nỹtĩ kar ag ke gé. ⁸Vĕnh kar vỹ ajag tỹ nén han mũ mĕgmĕ kãn huri. Topĕ vĩ tó ajag tóg mũ, hã kỹ ag tóg ga tỹ Macedônia tá mĕgmĕ, ga tỹ Grécia tá ke gé, ěmã kar mĩ hã. Ajag tỹ Topĕ ki ge mũ mĕgmĕ kãn ag tóg huri. Isỹ ag mỹ tó sór kỹ ag tóg: “mĕ ěg huri,” he tĩ. ⁹Kỹ ag tóg inh mỹ kãmĕn mũ, sỹ ajag mỹ Topĕ vĩ tó ja ěn ti. “Ã vĩ kri fig ag nĕji mũ, Tessalônica tá ke ag,” he ag tóg tĩ inh mỹ, ajag to. “Topĕ

ki ge kŷ ag nĕji nŷtĭ, vĕnh kăggrá tŷ topĕ tovănh kŷ, ag tŷ Topĕ vĭ hă han jé sir, ũn rĭr mŭ vĭ ti, hă vŷ: Topĕ pĕ, he mŭ,” he ag tóg tĭ ājag to. ¹⁰“Ti kósĭn nĕji vŷn kenh ke mŭ, kanhkă tá. Ti kătĭg jăvănh ag nĕji mŭ,” he ag tóg tĭ. “Topĕ nĕji ti rĭn măn, ti ter kar kŷ, Jesus ti. Ēn nĕji ěg krenkren han mŭ, ěg tŷ Topĕ jŭ vĕg tŭ nĭ jé, Jesus kătĭg jăvănh ag nĕji mŭ, Tessalônica tá ke ag,” he ag tóg tĭ ājag to.

Paulo tŷ ag mŷ Topĕ vĭ tó há han

2 ¹Inh kanhkă', inh ve ājag tóg, isŷ ājag mré nĭ ja nĭn kă. Isŷ ājag mŷ Topĕ vĭ tó kŷ ājag tóg Topĕ ki rá. ²Tó há han ja sóg nĭ. ³Cidade tŷ Filipos tá ag tóg inh vóg kónăn ja nĭgtĭ. Tá ag tóg iso é he ja nĭgtĭ. Tá kăkutĕ kŷ sóg ājag tá jun ja nĭgtĭ. Tag ki kanhró ājag tóg nŷtĭ. Ge ra sóg ājag mŷ tó, Topĕ vĭ sér ti. Ājag kamĕg ja tŭ sóg nĭ, Topĕ tŷ isar han kŷ, sŷ inh jagtar jagy ěn ve ja ra. ⁴Sŷ ājag jyvĕn kŷ sóg ājag mŷ ki hă tó ja nĭgtĭ, kygnĕ ja tŭ inh nĭ. Nĕn ũ vĕnhmŷ tó ja tŭ sóg nĭgtĭ gé. Ājag tŷ nĕn ũ to ěn ja tŭ sóg nĭgtĭ gé. ⁵Topĕ hă ne inh jykre ve kŷ inh mŷ: “ha inh vĭ ti tó,” he ja nĭ'. Hă kŷ sóg tó mŭ sir. Ēpră ke ag tŷ iso vĭ há han tŭ ra tóg inh mŷ tŷ nĕn ũ tŭ nŷ. Topĕ tŷ iso vĭ há han ke tag hă tóg inh mŷ há nĭ'. Hă jé sóg ti vĭ hă ki króm sór mŭ. Ti hă ne ěg jykre ve kŷ ěg ki kanhró nĭ', Topĕ ti.

⁶Hă kŷ sóg ājag mŷ ón kŷ: “há ājag tóg nŷtĭ,” he ja tŭ nĭgtĭ. Tag ve ājag mŷr. Ājag tŷ nĕn ũ to ěn ja tŭ sóg nĭgtĭ gé. Ājag ki sóg ganho ve sór ja tŭ nĭ gé. Topĕ hă ne tag ve! ⁷Kŷ ěpră ke ag tŷ iso vĭ há han tŭ ra tóg inh mŷ tŷ nĕn ũ tŭ nŷ mŷr. Ājag tŷ inh mŷ vĭ há han tŭ ra tóg inh mŷ tŷ nĕn ũ tŭ nŷ gé. ⁸Cristo hă vŷ inh jĕnĕ ja nĭ, hă kŷ tóg, sŷ ājag mŷ vĭ tar han há tóg tĭ vĕ. Hă ra sóg ke ja tŭ nĭ. Komĕr hă sóg vĭ ja nĭgtĭ. Ēg tŷ ěg krĕ kăsĭr mré vĭ ri ke han ja sóg nĭgtĭ. Gĭr mŷnh fi tŷ komĕr hă vĭ ěn ri ke han ja sóg nĭgtĭ. ⁹Ājag to sóg há tăvĭ nĭ, hă kŷ sóg ājag mŷ Topĕ vĭ sér tó kăn sór ja nĭgtĭ. Kŷ tóg inh mŷ tŷ nĕn ũ tŭ nĭ gé, sŷ ājag jagfy ter ke ti.

¹⁰Inh kanhkă', inh rănhrăj to jykrĕn nĭ. Inh rănhrăj vŷ inh kutăn tĭ. Kutŷ ki sóg inh rănhrăj han tĭ, kură ki ke gé, isŷ vĕjĕn comprar he jé. Hă kŷ sóg ājag jĕn ko ja tŭ nĭgtĭ. Topĕ vĭ hă tó ja sóg nĭ, ājag kanhrăn kŷ. Tag to jykrĕn. ¹¹Isŷ nĕn han mŭ ve kăn ājag tóg, kŷ Topĕ vŷ inh vĕg tĭ gé. Topĕ jykre hă han isóg tĭ, vĕnh jykre kurŷj ti, nĕn ũ vĕnhmŷ han vănh sóg nĭgtĭ. Ājag rĭnve sóg han, ājag tŷ Jesus ki ge kŷ nŷtĭn kŷ. ¹²Gĭr panh vŷ ā kósĭn jyvĕn tĭ, kŷ tóg keĵĕn ti jyvĕn tar han tĭ gé. Kŷ tóg keĵĕn vĭ há han tĭ gé, ti fŷn kŷ. Ti ri ke han ja sóg mŷr, ājag mŷ. ¹³Hă kŷ sóg ājag fe tar han. Ājag jyvĕn ja sóg nĭgtĭ, kŷ sóg ājag jyvĕn tar han ja nĭgtĭ gé keĵĕn, kŷ sóg ājag fe tŷ hăl he ja nĭgtĭ gé, sŷ ājag jyvĕn tar han kar kŷ. Ājag tŷ Topĕ jykre ki króm jé, hă jé sóg ājag mŷ ke ja nĭgtĭ. Ti hă ne ājag kuprĕg!, ājag tŷ ti tŷ tŷ ěg păl' nĭ ve jé, ājag tŷ ti jykre mág ve jé, ti jykre tŷ ěg kăfór nĭ ěn ti. ¹⁴Ājag tŷ Topĕ vĭ mĕ kŷ ājag tóg to: “hej,” he ja nĭgtĭ. Ājag mŷ sóg tó, ti vĭ ti, kŷ tóg ājag mŷ há ja nĭgtĭ. Tag to sóg Topĕ mŷ: “ă hă ne tóg ag krĭn!, kŷ tóg inh mŷ sér tĭ,” he tĭ. Kură kar ki sóg ti mŷ tó tĭ. Isŷ ājag mŷ Topĕ vĭ tó kŷ ājag tóg to: “Topĕ vĭ vĕ,” he ja nĭgtĭ. Hă ra tóg ge nĭ. Hă kŷ tóg ājag jykre kugrynh mŭ sir, Topĕ vĭ ti, ājag tŷ ti vĭ kri fin kŷ.

¹⁵Inh kanhkă', ga tŷ Judĕia tá ke ag kóm ājag tóg vĕsŷrĕnh mŭ. Tá ũ ag tóg vĕnh măn tĭ, Topĕ vĭ mĕ jé, ag tŷ Jesus Cristo ki ge kŷ nŷtĭn kŷ. Kŷ ag mré ke ag tóg ag

vóg kónān tī, Israel ag. Ge ti nī gé, ājag mré ke ag tỹ ājag vóg kónān ti. Hā kỹ ājag tóg ag kóm vēsýrénh mǔ gé. ¹⁵Israel pā'i ag vỹ Jesus tén, ěg Senhor ti. Topě vī tó ti ag kǎgtén ag tóg tī gé. Kỹ ag tóg ěg vóg kónān tī gé sir. Hā ki ag tóg Topě jū han tī. Ęprā ke kar ag kato vāsānsān ag tóg tī. ¹⁶Hā kỹ ag tóg inh mỹ: “ker fóg ag mỹ vī hē!” he tī. “Ker kanhgág ag mỹ Topě vī tó hē!, ag krenkren tū nī jé,” he ag tóg tī inh mỹ. Hā ki ag tóg Topě vī mrynhmranh kǎn tī. Kỹ ag tóg ti vī mranh kǎn kỹ nỹtī ha. Hā kỹ Topě tóg ag to jū mǔ sir. Kỹ tóg ag vóg kónān kǎn ke mǔ gé sir, vēnh kaja jé.

Paulo krī kufy

¹⁷Inh kanhkā!, isỹ ājag vég tū nīn kỹ tóg inh mỹ e tī. Hā kỹ sóg fe kaj nī. Tǎg ti tī ver, sỹ ājag ve ja tī. Hā ra inh pí(jé) ājag kǎ jatu! he mǔ!. Ājag ve sór tāvī inh nī, kỹ sóg ājag to kǎtīg kren. ¹⁸Isỹ ājag to kǎtīg ke vē vē, hā ra Satanás vỹ inh kato tē. Kar kỹ sóg to jykrén mǎn, hā ra Satanás vỹ inh kato tē mǎn. Hā kỹ sóg ājag to jun ja tū nī, inh, hā vỹ: Paulo, he mǔ. ¹⁹Ājag hā to sóg jykrén mǔ, Jesus tỹ ājag hā ki inh jykre ve jé, ti kǎtīg mǎn kỹ, ěg Senhor ti. Ājag tỹ ti vī ki króm kỹ tóg vég mǔ, inh rǎnhraj tī, Jesus ti. Ājag hā to inh fe tóg mrin ke mǔ, ājag hā ki sóg tỹ ūn mág nīnh mǔ, Jesus mỹ. Hā kỹ sóg ājag to jykrén tī. ²⁰Ājag hā tugrīn sóg tỹ ūn mág nī, ājag hā tugrīn tóg inh mỹ sér tī.

3 ¹Ājag to jykrén mág sóg tī, hā kỹ sóg Timóteo jēnē ja nī, ti tỹ ājag ve jé, ěg tỹ cidade tỹ Atenas tá nỹtīn kỹ. Ti mỹ sóg: “ha inh ré kỹ tīg,” he ja nī, “sỹ inh pí mỹ tag kǎ nī jé,” he ja sóg nī. “Ag hỹn ne han mǔ?” he sóg mǔ, kỹ ag venh tīg, inh mỹ,” he ja sóg nī ti mỹ, isỹ ājag to krī kufy ja nīn kỹ. ²Timóteo vỹ tỹ Jesus mré ke nī. Topě camarada ri ke tóg nī. Cristo kāmén ti tǔgtī, inh ri ke. Kỹ tóg ājag tá jun kỹ ājag jyvēn ja nī, ājag fe tỹ hǎ! he ja tóg nī, ājag tỹ Jesus ki rǎ tovānh tǔg jé. Hā jé sóg ti jēnē ja nī. ³“Hēn ri ke mūn ag hỹn krī kufy nỹtī, ag jagāgtar mūn kỹ,” he ja sóg nīgtī ājag to. “Ag mré ke ag ne tóg ag vóg kónān mǔ!, Topě jykre to!” he ja sóg nīgtī. Hā ra sóg ājag mỹ tó ja nī, ěg jagāgtar ke ti, Topě jykre to. ⁴Isỹ ājag mré nī mǔ ěn kǎ sóg ājag mỹ tó, ěg jagāgtar ke ti, ti tugrīn. Hā ra tóg ge nī. Hā to ājag tóg jagāgtar tī, vēsýrénh tī sir. ⁵Hā kỹ sóg Timóteo jēnē, isỹ ājag to krī kufy ja nīn kỹ. “Ag mỹ Topě tovānh tū nī vỹ?” he ja sóg nī. “Ěg krīn kónān tī ěn mỹ ag krīn tū nī vỹ, Japo ti?” he ja sóg nī mỹr. “Ti tỹ ag krīn kónān kỹ sóg tagrīnh mỹ ag mỹ tó ja nī mỹr!” he ja sóg nī ājag to. Hā kỹ sóg Timóteo jēnē ja nī.

Timóteo tỹ Paulo krī kuprǎg

⁶Hā ra tóg sir inh ki jun mǎn mǔ, Timóteo ti, ājag ve kar kỹ. Ūri tóg jun. Ājag kāmén tóg mǔ, tó há han tóg mǔ, kỹ inh fe tóg mrin ke mǔ sir. “Jesus ki ge to tar ag nỹtī,” he tóg mǔ. “Jagnē to há ag nỹtī, ā mī ěkrég ag tóg tī. Ā ve sór ag tóg tī. Ā tỹ ag ve sór ri ke han ag tóg tī,” he tóg mǔ inh mỹ, Timóteo ti. ⁷Kỹ inh krī tóg kǎnhvǎ! he mǔ sir ājag to. Inh jagtar mǔ ra inh fe tóg hǎ! he mǔ sir, ājag tỹ Jesus ki ge kỹ nỹtīn kỹ. ⁸Ājag tỹ ti to tar nỹtīn kỹ tóg inh mỹ inh rīr mǎn ri ke nī, kỹ sóg mrin ke ri ke han mǔ sir. ⁹Topě mỹ sóg vī há han mǔ sir ājag to. Inh fe vỹ mrin ke mǔ, sỹ ājag tỹ nén han mǔ ěn mē kỹ. Hā kỹ

sóg Topê mý ví há han mũ sir, ãjag tỹ inh fe tỹ mrin ken kỹ. ¹⁰Kuty kar ki sóg ti mré vēmén tí, kurã kar ki ke gé. Sỹ ãjag ve sór nĩn kỹ sóg Topê mý isĩg ke to ví tí, sỹ ãjag tar han sór kỹ, ãjag tỹ ti ki rã to tar nỹtĩ jé.

¹¹Topê tỹ kejēn inh mý: “ha ag venh tũg,” hen kỹ tóg inh mý sér tũnh mũ, ěg jóg mág tỹ inh mý tag tó kỹ, Jesus ti ke gé, ěg Senhor ti. ¹²Ěg Senhor mý sóg to ví tí, ti tỹ ãjag tỹ jagnē to há tãví han jé. Jagnē to há ãjag nỹtĩ, kỹ sóg ti mý to ví tí, ti tỹ tag to ãjag tar tãví han jé, ãjag tỹ vēnh kar to há nỹtĩ to tar nỹtĩ jé gé, isỹ ãjag to há nĩ ri ke. ¹³Kỹ sóg ti mý to ví tí gé, ti tỹ vēnh jykre há to ãjag tar han jé. Kejēn ěg Senhor tỹ Jesus vỹ kãtũg mãn ke mũ, ã tú kar ag mré. Ěg jóg tỹ Topê tỹ ũri ãjag tar han kỹ ãjag tóg kurã ěn kã ti rĩnja tá jãnhkri nỹtĩnh mũ, ãjag tỹ kygnē ja tú nĩn kỹ.

Jesus jykre mĩ ěg mũnh ke mũ

4 ¹Inh kanhkãl, vãhã sóg ãjag mý nén ũ to sór mũ gé. Ěg Senhor tỹ Jesus rĩnve sóg ãjag jyvēn sór mũ. ãjag mý sóg ti jykre tó huri, ãjag tỹ ti japry jagma, ti jamĩn jagma mũ há han jé, ãjag tỹ Topê mý há nỹtĩ jé. Tag han ãjag tóg mũgtĩ. Gemnĩ. To tar nỹtĩmnĩ. ²Tag kãmén sór isóg mũ ãjag mý, ěg Senhor tỹ Jesus tỹ inh mý: “tag tómnĩ,” he ja nĩn kỹ. ³Topê vỹ ãjag to jykrén, ãjag tỹ ti jykre hã han jé. Kỹ ãjag prũ tú fag mré nỹ tũg nĩ, ãjag mén tú ag mré nỹ tũg nĩ gé. ⁴ãjag tỹ ãjag prũ fi mré nỹ kỹ fi mré nỹ há han nĩ, Topê jykre han jé. Kỹ ěprã ke ag vỹ ãjag to jykrén kónãn ke tú nĩ gé. Fi tỹ prũg kónãn tũg nĩ. ⁵Fi to ěn kónãn tũg nĩ gé, ãjag prũ fi to. ũ tỹ Jesus ki rã tú ag jykre han tũg nĩ. ũ tỹ Topê jykre ki kagtũg nỹtĩ ag jykre han tũg nĩ, ãjag prũ fi to. Fi tỹ prũg há han nĩ.

⁶ãjag régre tỹ nén ũ to ěn tũg nĩ. Ti tú vē mýr, kỹ ti tú ki Topê ví mranh tũg nĩ. Topê hã ne tag to jũ tí! Kỹ ãjag régre tỹ nén ũ vóg tũg nĩ. ãjag tỹ ti tú vóg kỹ Topê vỹ ãjag vóg ke mũ gé, ti kajãm jé. Tag tó sóg huri ãjag mý, tag to sóg ãjag mý ví tar han huri, hã ra sóg ãjag mý tó mãn mũ gé. ⁷Ěg tỹ vēnh kavēnh kỹ ěg tóg Topê jykre han tú nĩgtĩ mýr. Ti jykre vỹ kuryj nỹ. Ěg tỹ tỹ ti tú nỹtĩ hã jé tóg ěg kuprēg. ⁸Ěprã ke ví pijé! sỹ ãjag mý nén tó mũ tag tí! Topê ví vē mýr. ãjag tỹ inh ví tag han tú nĩn kỹ ãjag tóg Topê ví mranh mũ. Ti hã ne tóg ã kuprĩg tỹ inh jagrē han ja nĩ!, kỹ tóg tỹ ãjag jagrē han ja nĩ gé.

⁹Nén ũ to ãjag tar nỹtĩ, hã vỹ: jagnē to há, he mũ. Hã kỹ sóg tag to ãjag mý rán mág han ke tú nĩ. Topê vỹ ãjag kanhrãn, ãjag tỹ jagnē jagãgtãn ken ki. Ki hã han ãjag tóg tí. ¹⁰Ga tỹ Macedônia tá ke kar ag to ãjag há nỹtĩ, Jesus mré ke kar ag to ke gé. To tar nỹtĩmnĩ, to krónh ke tũg nĩ, ãjag tỹ tỹ Jesus mré ke nỹtĩn kỹ. Hã jé sóg ãjag jyvēn mũ.

¹¹Vãsãn nĩ, ãjag tỹ jatun mý nỹtĩ jé, jatun mý ãjag rãnrhãj hyn han jé. ãjag rãnrhãj pē ěn to tar nỹtĩmnĩ, hã jé sóg ãjag jyvēn ja nĩ. Kỹ sóg to ãjag jyvēn mãn mũ, ãjag rãnrhãj to. ¹²Kỹ nén ũ vỹ ãjag mý tú! henh ke tú pē nĩ. Hã ki vēnh kar tóg ěg jykre há ki kanhró nỹtĩnh mũ. ãjag tỹ ãjag rãnrhãj to nén ũ kar ve kỹ tóg há tí, ũ tỹ ãjag mý nén ũ nĩm tú nĩ jé, fagrĩnh mý.

Jesus mré ke ter kÿ fÿ mág tũg nĩ

¹³Inh kanhkã', sÿ nén ù ki ájag kanhrãn há tóg tĩ gé, ha mẽ. Ëg mré ke ù ag tóg kãgter kÿ nÿtĩ. Kÿ fÿ mág tũg nĩ ag jé. Jesus ki ge tũ ag ri ke han tũg nĩ. Ag ter kÿ ag tóg nén ù há venh ke tũ nĩ. Hã kÿ ag tóg fÿ mág tĩ, Jesus ki ge tũ ag. Hã ra tóg ãg mÿ ge tũ nĩ. ¹⁴Jesus vÿ ter ja nĩ, kar kÿ tóg rĩr mãn ja nĩ. Tag ki kanhró ãg tóg nÿtĩ. Hã ri ke ti nĩ, Jesus ki ge mũ ag kãgter ti. Topẽ vÿ ãg han mãn ke mũ, Jesus tugrĩn, ãg tÿ ti mré nÿtĩ jé sir. ¹⁵Ëg Senhor vÿ inh kanhrãn, hã kÿ sóg tó mũ. Ti jẽnky ki tóg kutẽ, sÿ tónh ke tag ti, ha mẽ. Ver ãg rĩnrĩr nÿtĩ. Hèn ri ke mũn ãg kãgter kãn ke tũ nĩ, ti kãtig ken jo. Kÿ ãg tóg ti kãtig venh mũ sir. Hã ra ãg tóg ùn kãgter mũ ag jo mũnh ke tũ nĩ. Ag hã mré ãg tóg mũnh ke mũ.

¹⁶Ti kãtig vÿ ge nĩnh mũ, ha mẽ. Tére jé tóg ke mũ, ãg Senhor ti, kanhkã tá. Kÿ vẽn h vĩ tóg mẽ há tĩnh mũ. Topẽ tÿ jẽnẽ jafã ag pã'i mág vÿ prẽr ke mũ sir. Topẽ tÿ vãkyn jafã vÿ mẽ há tĩnh mũ, trombeta ãn ti. Kÿ ùn kãgter mũ ag vÿ rĩnrĩr mãn mũ sir, Jesus mré ke ag. ¹⁷Kar kÿ ãg tóg ag mré jãpryn h mũ gé, ãg tÿ ti kãtig ke jo ter tũ há ra. Ag mré ãg tóg jãpryn h mũ, ùn rĩnrĩr mãn mũ ag mré. Kanhkã góg kãmĩ ãg tóg jãpryn h mũ, kÿ ãg tóg ãg Senhor kato tẽgtẽnh mũ sir, kanhkã krẽm. Hã kÿ ãg tóg ti mré nÿtĩnh mũ sir, ãg Senhor mré, ãg tÿ kanhkã ra mũn kÿ. Ti ré kÿ ãg mũ mãn ke tũ nĩ sir. ¹⁸Tag tómnĩ jagnẽ mÿ, ájag krĩ tÿ kãnhvÿ' he jé, ùn kãgter mũ ag to.

Jesus tÿ kãnhmar kãtig mãn ke

5 ¹Inh kanhkã', ti kãtig ke ki kanhró ãg tóg nÿtĩ, hã ra ãg tóg ti kurã hã ki kãtig nÿtĩ, ti prÿg ke gé. Tag mẽ ájag tóg huri, hã kÿ sóg ájag mÿ tó mág ke tũ nĩ ha. ²Vãhãn kãtig, ãg Senhor ti, hã ra tóg tÿ nén ù péju mé kãtig ri ke nĩnh mũ, ti kãtig ti. Ëg vatãnh tá tóg ãg tũ mãg tĩ, nén ù péju mé ti. Kÿ tóg ge nĩnh mũ, ãg Senhor kãtig ti. ³Ti to há tũ ag vÿ: "jatun mÿ ãg nÿtĩ," henh ke mũ. "Û vÿ ãg vóg ke tũ nĩ," he jé ag tóg ke mũ. Ag tÿ tag tó mũ ra tóg vãhã kãtĩ mũ, ãg Senhor ti. Kÿ ag tóg nũgme ki vár mũ sir. Ag tÿ to jykrén tũ há ra ti kãtig kÿ ag tóg krenkren ke tũ pẽ nĩ, ha vemnĩ.

⁴Inh kanhkã', ájag hã ne tóg tÿ Jesus mré ke nÿtĩ'. Hã kÿ tóg ájag ki kuty tũ nĩ. Kÿ ájag tóg ki kanhró nÿtĩ, kÿ ti kãtig vÿ ájag mÿ nén ù péju mé kãtig ri ke tũ nĩ, ájag tÿ ti ki kanhró nÿtĩn kÿ. ⁵Ti krẽ vÿ tÿ ájag nÿtĩ, hã kÿ tóg ájag ki kurã nĩ, ájag tÿ ki kanhró nÿtĩn kÿ. Kuty tũ ti nĩ, ãg kĩ. Ti kãtig ke ki kanhró ãg tóg nÿtĩ, hã kÿ tóg ãg ki kurã nĩ sir.

⁶Kÿ ti kãtig ke kã jatu ke tũg nĩ. Vẽso jykrén nĩ, ájag tÿ ti kãtig ke to vẽn h preparar ken jé, ájag tÿ kã jatu ke tũ nĩ jé. ⁷Ûn nũgnũr mũ ag vÿ kuty kÿ nũgnũr tĩ, kÿ ag tóg ti kãtig ke kã jatu nÿtĩ. Kÿ ùn kronkron mũ ag vÿ kuty kÿ pẽnmev nÿtĩ, kãgter ag nÿtĩ gé. Kÿ ag tóg vẽso jykrén tũ nÿtĩ. Kuty tá vẽn h jykrén hã vẽ. ⁸Ëg jé kurã tá vẽn h jykre há ãn ti han jãvo. Ëg jé vẽso jykrén kÿ ti ki rã to krónh ke tũg. Ëg jé jagnẽ to há to krónh ke tũg gé.

Kỹ ãg tóg vãnh génh jafá ag tar ri ke nýtĩ. Kỹ tóg ãg mỹ soldado kur ri ke nĩ sir, ti ki rá ti, jagně to há ti ke gé. Soldado tỹ camisa tỹ ferro ri ke ti nĩ, ãg tỹ ti ki rá kỹ jagně to há to tar nýtĩn kỹ. To tar nýtĩn kỹ ãg krenkren ke mũ, nũgme ki vár ke tũ ãg nĩ. Tag mĩ ěkrén nĩ. Kỹ tóg ãg mỹ soldado tỹ sãpe tỹ ferro ri ke nĩ sir, ãg tỹ ti ve sór mũ to tar nĩ ti. To tar nýtĩn kỹ ãg tóg vãnh preparar ke kỹ nýtĩ, vãnh kãn kỹ ãg nýtĩ, ti kătĩg ke to. ⁹Topě vỹ ãg kuprěg, ãg tỹ ti jũ vėg tũ nĩ jé, ãg krenkren jé, ãg tỹ nũgme ki vár tũ nĩ jé, Jesus Cristo tugnĩn, ãg Senhor ti. ¹⁰Ti há ne ãg jagfy ter ja nĩ, ãg tỹ ti tugin rĩnrĩr nýtĩ jé, ti mré nýtĩ jé sir. ãg tỹ ti kătĩg ke jo kãgter mũ ra ãg tóg ti mré nýtĩnh mũ, ti kătĩg kỹ. ãg kãgter tũ ra ãg tóg ti mré tá nýtĩnh ke mũ gé, ti kătĩg kỹ. Jagně ri ke ãg nýtĩnh mũ. ¹¹Tag tómnĩ jagně mỹ. Tỹ jagně krĩ tỹ kãnhvy' hemnĩ gé, ùn ter mũ to. Kỹ tỹ jagně jyvěn nĩ gé, ãjag tar nýtĩ jé. Tó ãjag tóg mũgtĩ, kỹ tó há han nĩ.

Vãnh jykre há ti

¹²Inh kãnhkã', nén ù tó jé sóg ke mũ gé. ãjag kãmĩ ù ag tóg tỹ ãjag pãĩ nýtĩ, igreja to, Jesus mré ke ù ag. ãjag jyvěn ag tóg tĩ, ãjag to ag tóg vãsãn tĩ. ¹³Ěn ag kamėg nĩ. Ag mỹ vĩ há han nĩ, ag to há tãvĩ nýtĩmnĩ, ag tỹ ãjag ki rĩr kỹ. Jagně krĩ rỹg tũg nĩ.

¹⁴Inh kãnhkã', tag ti tó jé sóg ke mũ gé, ha mẽ. Û tỹ vėnhmỹ mẽ ag jyvěn tar han nĩ. Û tỹ kãnhmar krónh ke ti ag mré koměr vĩmnĩ. Ûn fe krónhkrój ag fe tỹ tar' hemnĩ. Vãnh kar mỹ koměr hã vĩmnĩ. ¹⁵Û tỹ ãjag mỹ nén ù kórég han mũ ra ti mỹ nén ù kórég han tũg nĩ jãvo, vãnh kajãm tũg nĩ. Nén ù há tãvĩ han nĩ jagně mỹ, vãnh kar mỹ ke gé.

¹⁶Kurã kar ki ãjag fe tỹ mrin kemnĩ. ¹⁷Kurã kar ki ãg jóg mág mré vĩmnĩ, ãjag tỹ ti to krónh ke tũ nĩn jé. ¹⁸Nén ù kar to ti mỹ: “inh mỹ tóg há tĩ,” hemnĩ gé. Topě jykren hã vė. Jesus Cristo nón ãg tóg ti jykre han ke mũ. ãg tỹ nén ù vėg mũ kar to ãg tóg: “inh mỹ tóg há nĩ,” henh ke mũ, Topě mỹ.

¹⁹Topě kuprĩg tỹ ãjag krĩn sór kỹ ti mỹ: “vó,” he tũg nĩ. ²⁰Kejėn Topě kuprĩg tóg ù krĩn tĩ, kỹ tóg Topě vĩ tó mũ sir. Ěn to é he tũg nĩ. ²¹Û tỹ ãjag mỹ vĩn kỹ to: “vãnh vĩ há mỹ?” hemnĩ. Ti tỹ tỹ ãjag mỹ vãnh vĩ há nĩn kỹ jėmėmnĩ. ²²Ti há tũ nĩn kỹ jėmė tũg nĩ, ãjag tỹ nén ù kórég han tũg jé. Nén ù kórég han sór tũg nĩ.

²³Topě vỹ ãjag krĩ kuprãg tĩ. Ti mỹ sóg to vĩ tĩ, ti tỹ ãjag tar han jé, ãjag tỹ tỹ ti tũ nýtĩ to tar nýtĩ jé. Ti mỹ sóg to vĩ tĩ gé, ti tỹ ãjag tỹ kygně kamėg jé, ti tỹ ãjag jykre há han jé, ãjag fe ti ke gé, ãjag krĩ ti ke gé. ãg Senhor tỹ Jesus Cristo kătĩg mãn kỹ tóg ãg jykre tugnỹm ke mũ sir, hã jé tóg ãg jykre há han sór mũ. ²⁴Û tỹ ãg kuprěg mũ vỹ ãg jykre há han sór mũ, hã vỹ: Topě, he mũ. Fagrĩnh mỹ vĩ vãnh ti nĩgtĩ.

²⁵Inh kãnhkã', iso Topě mré vĩmnĩ gé. ²⁶Jagně ki nhun ke ri ke han nĩ, Jesus mré ke kar ki, jagně nĩgé kãgmĩ kỹ. ²⁷ãg Senhor rĩnve sóg ãjag mỹ tag tó mũ, ha mẽ. “Jesus ki ge kỹ nýtĩ kar ag tỹ isỹ nén rán mũ tag mẽ

kãn ke vễ,” he sóg mũ mỹr. Hã kỹ sóg: “ag kar mỹ to kemnĩ,” he mũ. ²⁸Ëg Senhor tỹ Jesus Cristo mỹ sóg to vĩ tĩ, ti tỹ ãjag tar han jé.

Hã vễ.